

# TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS

Iha 11 Abril 2016, Governu Timor-Leste hahú konsiliasaun kompulsoria tuir Nasoens Unidas nia Konvensaun ba Lei Tasi (**UNCLOS**) ho objetivu atu hetan akordu ida kona-ba fronteiras marítimas permanentes ho Austrália.

## Saida mak konsiliasaun kompulsoria?

Konsiliasaun kompulsoria mak prosesu ida tuir UNCLOS (Aneksu V, Seksaun 2) ne'ebé konsiliador sira husi painel ida sei ajuda Estadu sira ne'ebé envolve hodi koko buka hetan solusaun amigável ida ba sira nia disputa.

Prosesu ida ne'e bele uza ba iha sirkumstânsia hirak ne'ebé seidak iha akordu entre Estadu viziñu sira no bainhira Estadu ida halo ona deklarasaun hodi esklui husi jurisdisaun ba orgaun obrigatória hodi rezolve disputa kona-ba fronteiras marítimas, hanesan Austrália halo tiha ona. Konsiliasaun kompulsoria bele ajuda Estadu ida hanesan Timor-Leste koko atu rezolve disputa fronteira marítima ida bainhira nia la iha opsaun seluk tan.

Konsiliasaun ne'e painel ida ho konsiliador independente nain lima mak sei hala'o nudar komisaun konsiliasaun. Komisaun ne'e sei buka atu komprende faktu no pozisaun legal husi Estadu idak-idak nian.

Se Austrália ho Timor-Leste la bele hetan akordu ida, komisaun konsiliasaun ne'e sei fornese relatóriu ida ba Sekretáriu Jeral Nasoens Unidas nian ho rekomendasaun sira hodi tulun atu hetan rezolusaun. Austrália no Timor-Leste sei iha obrigasaun hodi negosia ho boa fé bazeia ba komisaun nia relatóriu.

## Tanba sa mak Timor-Leste hili konsiliasaun kompulsoria?

Konsiliasaun kompulsoria mak agora dadaun hanesan dalan úniku ne'ebé disponível ba Timor-Leste hodi lori Austrália ba negosiasaun ba fronteiras marítimas permanentes. Ida ne'e tanba:

1. Iha Marsu 2002, fulan rua molok Timor-Leste nia restaurasaun ba nia independênsia, Austrália hasees-aan husi prosesu obrigatóriu hodi rezolve disputa relaciona ho

fronteiras marítimas tuir UNCLOS no Tribunal Internasional ba Justisa. Ida ne'e esklui possibilidade ba tribunal internacional ida hodi desidi fronteiras marítimas entre Timor-Leste no Austrália; no

2. Austrália rekuza atu negosia fronteiras marítimas bilateralmente. Fronteiras marítimas mak kestaun soberania ba povu Timor-Leste. Governu Timor-Leste sei konsidera opsaun hotu-hotu hodi atinji nia direitu tuir lei internacional.

## Saida mak akontese agora?

Timor-Leste notifika Austrália hodi hahú konsiliasaun kompulsoria iha 11 Abril 2016. Timor-Leste no Austrália idak-idak hili ona konsiliador nain rua no iha 25 Juñu 2016, konsiliador nain haat ne'e hamutuk hili membru membru dalima ba Komisaun Konsiliasaun, ida ne'ebé mos sai hanesan Prezidente ba Komisaun.

Prosesu konsiliasaun ne'e fó oportunidade ba Timor-Leste no Austrália hodi prezenta ba Komisaun no hodi tuir audênsia sira.

## Oinsa ho Indonézia?

Konsiliasaun ne'e haree ba disputa entre Timor-Leste no Austrália nian deit.

Timor-Leste nia viziñu marítima seluk, Indonézia, konkorda tiha ona atu negosia fronteiras marítimas bilateralmente ho Timor-Leste tuir lei internacional, liu-liu UNCLOS.

Timor-Leste hahú konsiliasaun kompulsoria; notifika Austrália

Forma Komisaun Konsiliasaun no desidi nia prosedimentu

Konsiliasaun - estadu sira ne'ebé envolve halo submisaun no tuir audiênsia

komisaun halo rekomendasaun iha sira nia relatóriu

Estadu ne'ebé envolve tenki negosia ho boa fé



**FIXA  
INFORMASAUN  
2016**

Aprende tan @ [www.gfm.tl](http://www.gfm.tl) ka kontaktu:  
**Gabinete Fronteiras Marítimas**  
Konsellu ba Delimitasaun Definitiva ba Fronteiras Marítimas  
Governu Demokrátika Repúblika Timor-Leste  
e: [info@gfm.tl](mailto:info@gfm.tl) tel: +670 7742 5544



**Gabinete  
Fronteiras  
Marítimas**